



16. august 2024

UKA 2024/122

Matumuuna Inatsisartut ingerlatsinermut maleruaqqusaanni § 33 tunngavigalugu siunnersuut una saqqummiunneqarpoq:

Najukkani innuttaasunik kiisalu takornarianik nunanit allaneersunik suliarinninnissamut pisussaaffik naammassisinnaaniarlugu takornariat amerlanerpaaffianni Kalaallit Nunaanni peqqinnissaqarfimmi peqqinnissakkut sulinneqarnermi ikiorserneqartarnissamik aqqissuulluakkamik isumaqatigiissuteqarnissaq siunertarlugu nunarsuarmi peqqinnissakkut suliniaqatigiiffissuarmut, WHO-mut, attaveqarnissamut Naalackersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Anna Wangenheim, Demokraatit)

Tunngavilersuut

Nunatsinni takornariaqarneq annertusiartorpoq. Takornariat amerlinerat peqqinnissaqarfimmut artukkiivoq, pingaartumik amerlanerpaaffianni, tikeraat amerlisarmata¹. Peqqinnissaqarfiup tunniussinnaasaanut pisariaqartitsinerit annertusinerisa nunaqavissut pisariaqartumik peqqinnissaqarfiup tunniussinnaasaanut atuinissaat killilersorsinnaavaat taamaalillunilu peqqinnissaannut kalluaasinnaalluni pitsaanngitsumik, ilisimagatsigumi, peqqinnissaqarfik ukiut tamaasa aasaanerani sulisukillisarpoq sulisut aalajangersimasumik atorfeqartut pisariaqarluinnartitaminnik aasaanerani sulinngiffeqartarmata.

Piffissani taakkunani minnerpaaffiatigut upalungaarsimanissaq qulakkeerniarlugu pisariaqarpoq nukinnik tapersersortissanillu saniatigut peqarnissaq. WHO-mik aqqissuulluakkamik isumaqatigiissuteqarnikkut maani nunatsinni nukinnik, immikkut ilisimasalinnik tapersersortissatsinnillu pisariaqartitatsinnik pisinnaavugut peqqinnissaqarfiup tatisimaneqareeqisup tapersernissaanut. WHO nunarsuaq tamakkerlugu misilittagaqarlunilu piginnaasaqarpoq nunat peqqissutsimut tunngasunik nukittorsarnissaannut, pingaartumik piffissani immikkut ittumik annertuunik suliassaqarfiusuni.

WHO-mik isumaqatigiissuteqarnerup takornariaannarnut peqqissutsikkut tunniussinnaasat pitsaanngorsaannassanngilai, aammali qulakkiissallugu, nunaqavissut kipisaqattaanngitsumik peqqissutsimut pisariaqartitanik atuisinnaanissaat. Tamanna maani nunatsinni innuttaasunut tamanut toqqisisimanerusumik allannguuaattumillu inissisimalersitsissaaq takornariaqarneq qanorluunniit sunniigaluarpas.

Assuarnarpoq, Naalackersuisut apeqqut pingaaruteqarluinnartoq WHO/Europap kingullermik ataatsimeeqatiginerani saqqummiussimanngimmassuk, tassanimi suleqatigiinnissamut nalunaarummik atsiortoqarmat. Taanna iliuuseqannginneq innuttaasut peqqissusaannik pingaartitsinnginnermik aammalu inuunerissaarnissaannik piffissani takornariarpassuaqarnermi sumiginnaaneruvoq.

Tamanna tunngavigalugu kissaatigaarput, Naalackersuisut WHO-mut saaffiginnissasut aqqissuulluakkamik peqqissutsikkut sullissinnissamik ikiortissamik isumaqatigiissusiornissaq siunertarlugu Kalaallit Nunaanni

¹ https://nun.gl/nyheder/2024/05/shv-og-krydstogtturisme-2023-3?sc_lang=kl-gl



peqqinnissaqarfimmi takornariat amerlanerpaaffianni. Isumaqatigiisummi ilaassapput peqqinnissaqarfimmi sulisunik immikkut ilassusiinissaq, katsorsaanermut atortunik aammalu upalungaarsimanissamut annertunngitsumik peqarnissamut nukiillu pisariaqartitat allat.

Suliniutit taakku apeqqutaalluinnarput, uagut Kalaallit Nunaanni pisussaaffeqaratta takornarianik ikiuissalluta, navianartorsiortunut peqqissutsikkullu sullinneqarnissamik pisariaqartitsisunut, aammali peqqissuunissamut illersuissalluta nunaqavissunut takornarianullu, aammalu maani nunatsinni peqqinnissaqarfik nukittoq sunniuteqarluartorlu qulakkeerniarlugu.

Tamanna tunngavigalugu neriutigaarput, Naalakkersuisut Inatsisartunilu partiit sinnerisa siunnersuut taparserumaaraat.

Pisortanut aningaasatigut allaffissornikkullu kingunissai

WHO-p atassuteqarfigineranut isumaqatiginiarneranullu atatillugu aningaasartuuteqassaaq. Taakkuli atofilittap ukiumut akissarsiaasa 500.000 koruunit qaangerneqarnissaat naatsorsuutigineqanngilaq.

Namminersorlutik inuussutissarsiuteqartunut aningaasatigut allaffissornikkullu kingunissai

Soqanngilaq.

Innuttaasunut aningaasatigut allaffissornikkullu kingunissai

Soqanngilaq.